



Dáta: 17/06/2020

Ciorclán Uimhir: 0040/2020

**Chuig: Boird Bainistíochta, Príomhoidí agus Foirne Teagaisc na
mBunscoileanna agus na Scoileanna Speisialta**

Chuig: Príomhfheidhmeannaigh na mBord Oideachais agus Oiliúna

**SOCRUITHE MAIDIR LE CIGIREACHT AGUS
FÉINMHEASTÓIREACHT SCOILE DON SCOILBHLIAIN 2020/2021**

***Cuir an imlitir seo ar a súile don fhoireann teagaisc ar fad agus d'fhoireann
chuí eile agus do bhaill uile bhord bainistíochta na scoile, le do thoil.***

Achoimre

Tá sé mar aidhm ag an gclár seo:

- na hathruithe atá déanta ar shocruithe don bhféinmheastóireacht scoile agus don chigireacht scoile a leagan amach, socruithe a aithníonn na dúshláin mhóra a bheidh ag múinteoirí, ag príomhoidí, ag boird bainistíochta, ag daltaí, ag tuismitheoirí agus ag comhthionóil scoileanna sa scoilbhliain 2020/21
- tréaniarrachtaí mhúinteoirí, chinnirí scoile agus bhoird bainistíochta a aithint agus iad ag tabhairt tacaíochta do dhaltaí ag baile le linn tréimhse dúnta na scoileanna in 2020
- soiléiriú a dhéanamh ar na socruithe atá déanta don bhféinmheastóireacht scoile (FMS) don bhliain 2020/21 agus a chur in iúl do scoileanna nach mbeidh aon éileamh breise ann maidir leis an FMS i rith na tréimhse seo
- scoileanna a spreagadh chun leas a bhaint as an FMS le haghaidh pleanála agus aghaidh a thabhairt ar na dúshláin a bhaineann le hathoscailt na scoileanna don scoilbhliain 2020/21 agus/nó obair ar an FMS a bhí leagtha amach do Mhárta-Meitheamh 2020 a chríochnú
- eolas a thabhairt ar obair threorach, thaighde agus mheastóireacht na Cigireachta sna scoileanna sa scoilbhliain 2020/21
- áit Ciorcláin 0039/2016 agus 0016/2018 maidir le féinmheastóireacht scoile sa tréimhse 2016-2020 a thógáil.

1. Comhthéacs an chiorcláin seo

I mí na Márta 2020, dhún an rialtas na scoileanna go léir ar mhaithe le sláinte an phobail de dheasca scaipeadh Cóovid-19 (An Coróinvíreas). Nuair a dúnadh na scoileanna, d'iarr an Roinn ar mhúinteoirí agus ar chinnirí scoile socruithe a dhéanamh chun leanúnachas foghlama agus scolaíochta a sholáthar dá ndaltaí.

Admhaíonn an Roinn gur chuir dúnadh na scoileanna tús le tréimhse dhúshlánach do chinnirí scoile agus do mhúinteoirí, agus iad ag obair chun tacaíocht a thabhairt d'fholláine agus d'fhoghlaim pháistí, d'fholláine mhúinteoirí agus d'fhoirne scoileanna, agus chun cuir chuige don teagasc agus don bhfoghlaim a athrú. Aithníonn an Roinn chomh maith, na saindúshlán atá ag daltaí gan dídean, daltaí imeallacha, agus ag foghlaiméoirí le riachtanais speisialta oideachais, agus cuireann an Roinn san áireamh freisin, na teaglaigh sin atá ag maireachtáil faoi strus agus éideimhne. Le linn na tréimhse seo d'éirigh le scoileanna agus le múinteoirí áirithe iarrachtaí tábhachtacha a dhéanamh chun tacú le daltaí ag baile, agus bhí idir dhúshlán agus thairbhe ag baint lena gcuid oibre i rith an ama éagoitianta seo.

Nuair a athosclófar na scoileanna faoi chomhairle na seirbhíse sláinte poiblí, tiocfaidh tuilleadh dúshlán chun tosaigh, gan dabht, thar raon leathan réimsí - eagrú ghnáthchlár laethúil na scoile agus folláine dhaltaí agus mhúinteoirí san áireamh.

2. Féinmheastóireacht scoile sa scoilbhliain 2020/21

De réir Ciorclán 0039/2016 bhí an dara sraith den bhféinmheastóireacht scoile (FMS) le bheith ar siúl ó Mheán Fómhair 2016 go dtí Meitheamh 2020 agus an triú sraith le tosú Meán Fómhair 2020. Admhaíonn an Roinn Oideachais agus Scileanna go bhfuil seans ann nach raibh daltaí, tuismitheoirí, múinteoirí, príomhoidí ná boird bainistíochta ábalta dul i ngleic leis an FMS le linn na tréimhse seo. Dá bharr seo, tá sé socraithe ag an Roinn Oideachais agus Scileanna leanúint leis an dara sraith den FMS go dtí Meitheamh 2021. Mar thoradh air seo, tosóidh an triú sraith den FMS, a bhí le tosú Meán Fómhair 2020, i Meán Fómhair 2021.

Ciallaíonn sé seo nach mbeidh aon iarratais nua FMS ann do scoileanna sa scoilbhliain 2020/21.

Sa scoilbhliain 2020/21 beidh solúbthacht ann do scoileanna:

- Próiseas na FMS a úsáid chun cabhrú leo aghaidh a thabhairt ar na dúshlán a thiocfaidh chun tosaigh le hathoscailt na scoileanna faoi threoir na seirbhíse sláinte poiblí. Ar na dúshlán sin, seans go mbeidh, mar shampla, gnéithe a bhaineann le heagrú ghnáthchúrsaí an lá scoile, folláine na ndaltaí agus na múinteoirí, athruithe (más gá) don churaclam

agus don mheasúnú agus athruithe sa teagasc, sa bhfoghlaim agus sna cleachtais mheasúnaithe

AGUS/NÓ

- Obair ar na gnéithe den teagasc agus den bhfoghlaim a bhí roghnaithe acu mar fhócas don bhféinmheastóireacht don tréimhse 2016-2020 a chríochnú.

De réir mar a bhaineann scoileanna úsáid as próiseas na FMS chun eochairghníomhaíochtaí atá ábharach dá gcomhthéacs féin a aithint, b'fhéidir go measfaidh siad tairbheach é, breis spriocanna/gníomhaíochtaí a chur leis an tuairisc FMS agus le plan feabhsúchán na scoile atá acu. Mar is gnách, cé nach é an taifead fócas na FMS i rith 2020/21, ba chóir cinntí tábhachtacha a thaifead i slí atá bríoch do chomhthionól na scoile.

3. Obair threorach, thaighde agus mheastóireacht na Cigireachta sa scoilbhliain 2020/21

Athróidh an Chigireacht a clár oibre chun tacú le scoileanna agus leis an gcóras oideachais de réir mar a athosclaítear na scoileanna. Coimeádfar sainghníomhaíochtaí obair na Cigireachta faoi athbhreithniú agus déanfar iad a athrú chun teacht le comhairle na sláinte poiblí agus leis na cúinsí sláinte a bheidh ann ag an am.

Treoir agus Taighde

Beidh príomhfhócas obair na Cigireachta sa chéad théarma den scoilbhliain 2020/21 ar threoir a thabhairt do scoileanna. Tríd an obair seo, tacóidh na cigirí le cinnirí scoile, le múinteoirí, le boird bainistíochta agus le comhthionóil scoileanna, soláthar éifeachtach a chur ar fáil don bhfoghlaim agus do dhul chun cinn gach páiste agus gach duine óg trí díriú go láidir ar riachtanais fhoghlaiméirí soghonta.

Beidh an Chigireacht gafa, freisin, le hobair thaighde agus déanfar iarracht eiseamláirí de chleachtais éifeachtacha a aithint agus a scaipeadh – scoileanna a raibh rath ar a n-iarrachtaí agus aghaidh á tabhairt acu ar riachtanais fhoghlaiméirí ar cuireadh isteach ar a gcuid scolaíochta agus a raibh dúshlán churaclaim agus fadhbanna eile le sárú acu nuair a athosclaíodh na scoileanna. Déanfaidh an taighde seo iarracht tuairimí mhúinteoirí, chinnirí scoile, thuismitheoirí agus fhoghlaiméirí a bhailiú agus a úsáid chun dea-chleachtas a threorú ar fud an chórais scoile.

Tabharfaidh an Chigireacht treoir agus tacaíocht do scoileanna freisin, de réir mar is cuí, i dtaca le cur i bhfeidhm comhairle na sláinte poiblí maidir le sláinte, sábháilteacht, agus folláine chomhthionóil na scoileanna i gcomhthéacs threoracha an Roinn Sláinte agus an Roinn Oideachais agus Scileanna agus údaráis ábharacha

eile, maidir le timpeallacht shlán shábháilte foghlama agus oibre a chruthú do gach duine.

Déanfar obair threorach agus thaighde na Cigireachta trí cuairteanna scoile nó trí obair ar líne de réir chomhairle na seirbhíse sláinte.

Tabharfar deis do scoileanna freisin, bheith rannpháirteach i seisiúin chomhairle faoi threoir na Cigireachta. Cé gurb iad an príomhoide scoile nó an bhainistíocht shinsearach a roghnóidh, de réir sainchomhthéacs gach scoil, fócas plé na seisiún, d'fhéadfadh go mbeadh san áireamh topaicí ar nós conas tacú le folláine chomhthionól na scoile, láidreachtaí sa teagasc agus sa bhfoghlaim i dtimpeallacht foghlama cumaisc a aithint, nó riachtanais reatha na bhfoghlaimoirí a mheas agus soláthar a dhéanamh dóibh. Is féidir cur isteach ar na seisiúin seo trí ríomhphost a sheoladh chuig info@schoolself-evaluation.ie.

Meastóireacht

I rith chéad théarma na scoilbhliana 2020/21 beidh fócas na Cigireachta ag díriú ar chomhairle, ar thacaíocht agus ar thaighde mar atá luaite thuas. Ní bheidh cigireacht ar scoileanna i gceist ach i gcás líon beag cigireachtaí atá práinneach: cigireachtaí a tosaíodh roimh 12 Márta 2020 a chríochnú; roinnt cigireachtaí i dtaca le Cumhdach agus Sábháilteacht leanaí; roinnt cigireachtaí leanúnacha práinneacha agus líon beag cigireachtaí riachtanacha eile san áireamh.

Forbairt Bhreise

Ta sé pleanáilte go leanfaidh an obair threorach, thaighde agus meastóireachta ar aghaidh i rith an dara agus an tríú téarma den scoilbhliain 2020/21 agus tá sé ar intinn ag an gCigireacht chomh maith, an gnáthchlár cigireachta a ath-thosú ar bhonn cúramach, teoranta i rith na tréimhse seo.

4. Próiseas foilsithe tuairiscí meastóireachta a rinneadh sa bhliain 2019/20 a chríochnú

Nuair a dúnadh na scoileanna ar an 12 Márta 2020, bhí roinnt tuairiscí meastóireachta á gcur le chéile le cur chuig scoileanna le haghaidh deimhniú fíricí nó freagra scoile sula ndéanfaí iad a chur i gcóir le haghaidh foilsithe ar shuíomh gréasán na Roinne. De bhrí nach raibh fáil ag boird bainistíochta ná foirne scoile ar fhoirgnimh na scoileanna ó 12 Márta 2020, níor eisíodh aon cheann de na tuairiscí sin do na scoileanna. Eiseoidh an Chigireacht na tuairiscí do bhunscoileanna ó 18 Meitheamh 2020 ach cuirfear siar spriocdhátaí don deimhniú fíricí agus don bhfreagra scoile go dtí 11 Meán Fómhair 2020.

Má fhaigheann scoil ar bith tuairisc le haghaidh deimhniú fíricí nó freagra scoile roimh an 30 Meitheamh 2020, áfach, agus más mian leo an fhoirm don deimhniú

fíricí agus/nó d'fhreagra na scoile a sheoladh ar ais roimh 11 Méan Fómhair 2020, déanfaidh an Chigireacht na foirmeacha a phróiseáil chomh luath agus is féidir.

Foilseofar tuairiscí, a bhí réidh le foilsiú i Mí Márta 2020, go luath ar shuíomh na Roinne.

Oifig an Phríomhchigire

oci@education.gov.ie